



Giovar teater fa plaschair.

FOTO S. PLANTA

Circus a Scuol

Scoula libra festagescha giubileum

DAD ANNETTA ZINI / ANR

■ Avant desch ons es gnüda fundada la scoula libra a Scuol. Quai celebresch'la cun ün teater in fuorma da circus. Ils uffants han gnü la pussibilità dad exercitar cull'actura engiadinaisa Annina Sedlacek. «In Frantscha es nat avant pacs ons il gener da circus 'Nouveau cirque', declera l'artista libra Annina Sedlacek da Sent, la quala ha frequentà la scoula da Dimitri. Quai saja üna cumbinaziun da teater e circus. «A l'elemaint teatral vegna bainschi dat daplü pais co a l'elemaint acrobatic», cuntinuesch'la, ch'eir quel elemaint saja però important per quista nouva fuorma da circus.

Daspö settember in preparaziun

Ils 24 uffants da la scoula libra han pudü tscherner al cumanzamaint da quist on da scoula lur specialisaziun da circus. Daspö là hana exercitè a chasa ed in posa da scoulas. Pür illas ultimas eivnas hana survgni il sustegn da l'actura Annina Sedlacek chi ha coordinà ils differents exercizis: «Tscherts uffants siglian culla corda, oters van cul velo d'üna rouda o cullas chommas da lain ed oters preschaintan gös cun diabolos. Implü s'haja la pussibilità d'observar a jongleurs.» Las differentas situaziuns sun organisadas da maniera teatrala. La lavur cullas scolaras e culs scolars tilla plascha. Ella manzuna chi haja dovrà ün tempet fin cha'ls uffants hajan pers lur retgnentschas d'agir e da sbragir sco drets artists.

«Scolaziun pella vita intera»

L'actura indigena es persvasa cha'ls uffants nun invlidaran plü ils differents exercizis d'acrobatica, da pantomima, d'indschegn e neir quels linguistics. «Üna jada chi s'ha l'equiliber e chi's sa ir

cul velo d'üna rouda, nu's perda quell'abilità plü», decler'la. Quista scolaziun es tenor ella ün imprendder pella vita intera chi'd es cumbinada cun l'elemaint social. Ils uffants imprendan nempè d'avair resguard vers tschels. Dürant las preschantaziuns da circus vegnan ils uffants accompagnats musicalmaing d'ün orchester indigen, sco chi tocca per ün dret circus.

Il circus da la scoula libra vain preschantà in mardi, ils 22 gün avantmezdi pellas scoulas, in marcurdi e gövgia a las 19.30 ed in sonda a las 19.00 cun ustaria.

Projets da circus sco alternativa

Daspö desch ons exista la scoula libra da Scuol. Ella es la prüma scoula Rudolf Steiner in l'intschess rumantsch ed as drizza als scolars indigens. La scoula libra vain manada sco scoula da di, quai chi vuol dir ch'ella spordscha giantar ed ura da lezcha. Ella vain finanziada da genituors, amis e fautuors. Il special da la scoula Steiner es il plan d'instrucziun: L'individualità ed il svilup da l'uffant stan i'l center da la scolaziun. Per promover il svilup dals uffants sun projets da teater, da circus e d'orchester interessantas alternativs als roms üsitats in scoula. Implü organischa la scoula cuntinuantamaing gitas, lavuors in tiert o sün bains, projets in god ed otras activitats da giodimaint chi güdan als uffants da viver consciantamaing il gir da l'on.



L'artista Annina Sedlacek: Hoz nun è la stria, dimpersè la redschissura. FOTO M. FONTANTA